

**Barundi, Barundikazi,  
Ncuti z'Uburundi,**

---

1. Umwaka w'2008 uratashe, uw'2009 urinjiye. Ni igihe ciza co gushimira Imana ko yatuzigamye. Nihabwe icubahiro kandi ize ituje imbere muri uyu mwaka dutanguye.
2. Ni igihe ciza kandi co kwisuzuma, tugashima canke tukanegura ivyo twaranguye, tugaca dutegura imigambi myiza ya kazozza.
3. Turipfuriye Abarundi n'ababa mu Burundi bose umwaka muhire, umwaka w'amahoro n'iterambere.
4. Icivugo c'uwu mwaka rero dutanguye w' 2009 ni :  
***"Twijukire ibikorwa, twiteho umutekano kuko ari yo nzira irashe ishikana kw'iterambere rirama".***

**Barundi, Barundikazi,  
Ncuti z'uburundi,**

---

5. Twagira tubacire ku mayange ivyaranguwe muri uyu mwaka dusozereye.
6. Mu vyerekeye politike, imigambwe itatu (3) mishasha yaremerewe, iyindi itatu (3) nayo yarasavye kwemererwa. Leta ikaba yararinganje ibiganiro biyihuza ku kwezi ku kwezi n'imigambwe yemewe n'amategeko kugira ngo bose bumve kumwe amategeko ayigenga, n'ibindi.
7. Amashirahamwe yigenga adaharanira inyungu za poritike nayo nyene arafise ikibanza mu buzima bw'igihugu. Dufise ayashika amajana atatutu na mirongo itanu (350).
8. Kugira ngo Leta yorohererwe mu migambi yayo myiza yo guteza imbere abanyagihugu, yarakoze Rusansuma rw'abantu n'uburaro.

Vyongeye irabandanya kwegereza ubutegetsi benegihugu, kugira ngo boroherwe mu kuronka inyishu z' ibibazo bitandukanye vyabo. Tukaba twaragendeye amakomine yose, dusangira inama n'ingingo, ndetse n'ibikorwa.

9. Uyu mwaka, twarakiriye abarundi bahunguka bagera ku **bihumbi mirongo icenda n'umunani (98)**, twubaka n'ibigwati vy'amahoro abahungutse badafise aho bashikira babamwo. Impunzi zikiri muri Tanzania zikaba zarongererejwe igihe kugira zitegure neza, na Leta kandi yitegurire neza kuzakira. Bamwe bamwe mu bahungiye hagati gihugu nabo barasubiye mu zabo.

**Barundi, Barundikazi,  
Ncuti z'uburundi,**

10. Mu vyerekeye umutekano, naho muri rusangi vyagenze neza uyu mwaka, haribonekeje ubukozi bw'ikibi butari buke. Turashima ko kuri izo nkozi z'ikibi, izishika **85%** zafashwe zigashikirizwa ubutungane.
11. Vyarashitse kandi ko umutekano uhungabanywa na bamwe bamwe mu bawujejwe. Ni co gituma abajejwe umutekano mu rwego rw'igipolisi bataye umurongo bashika ijana na mirongo itatu na batanu **(135)** bafashwe bagapfungwa, abashika amajana abiri na mirongo indwi na bane **(274)** nabo bagakurwa mu kazi.
12. Abajejwe umutekano bararushirijeho kugwiza ibikorwa bijanye no gusaka aho hose hikedwa ibirwanisho. Inkoho zababa amajana ane **(400)**, amasssu arenga ibihumbi mirongo itatu n'icenda **(39.000)**, ibirwanisho biturika nk'amagerenade vyababa ibihumbi mirongo ibibiri na kimwe **(21.000)** bikaba vyarafashwe canke vyarasubijwe ku neza. Leta iheruka kandi guhinyanyura bimwe mu bijanye n'ingene umurwi ujejwe gukura ibirwanisho mu banyagihugu ukora, gurtyo uronke inguvu.
13. Kugira ngo amahoro arame, abanyagihugu barasabwe kurushiriza kubera ijisho n'ugutwi abajejwe umutekano n'intwaro.

Twaraganiriye kandi **n'indongozi za FNL-Palipehutu, akarere n'umuhuza baradufasha**, turashika ku nyishu zituma ibibazo vyazitira ishirwa mu ngiro ry'amasezerano bihava. Leta ikaba yaramaze gusaba uwo muhari amazina y'abo yogenya mu bibanza vyumvikanyweko, kandi tukaba twaraye dusohoye itegeko ryo gupfungura abanywanyi ba **FNL-Palipehutu** twisunze amasezerano. Tukaba twizeye ko **n'uwo muhari utazorenga** ku vyasezeranywe naho tubona ukwega ibirenge.

14. Mu gisata co kwivuna abansi, harasanuwe amakambi, abasirikare nabo barafasha mu bikorwa vy'iterambere rusangi.

Twaraterereye agacumu k'ubumwe ibindibihugu bifise ingorane zikomeye z'umutekano, mu kurungika **ingabo nko muri Sudani, Côte d'Ivoire na Somalia.** Abasirikare kandi bararonkejwe inyigisho mu vyerekeye kurwanya iterabwoba, no kurwanya amabi y'ivyaduka.

### **Barundi, Barundikazi, Ncuti z'Uburundi,**

15. Twarakomeje imigenderanire myiza n'ibindibihugu cane cane mu kubigendera. Gushika uyu munsi nta gihugu na kimwe dufitaniye amatati. Ibi bigaragazwa n'ingendo abakuru b'ibindibihugu bagize aha iwacu, nk'aba Tanzaniya, Urwanda, Ubuganda na Zambiya.

Tuboneyeho akaryo ko gutera ivyatsi abarundi bamwe bamwe b'imburakimazi bagiye kwisuka mu ntambara yo muri Repuburika iharanira Demokarasi ya Kongo. Turashima ko abarongoye ico gihugu bategereye ko izo mburamutima zitatumwe **n'Uburundi**, imigenderanire hagati y'ibihugu vyacu ikaba yifashe neza.

Aha mu gihugu cacu, harabereye amanama menshi ahuza abashikiranganji canke intumwa z'amaleta menshi.

Uyu mwaka kandi waranzwe n'amahuriro y'amahiganwa haba mu vyo kwinonora imitsi canke mu vy'imico.

Tuboneyeho gukeza abagiye baratera iteka igihugu cacu mu kuronka ibibanza bibereye. Turakeje umwigeme **Claudia NIYONZIMA** ku kibanza aheruka kuronka mw'ihiganwa rya Miss East Africa.

Turashima kandi ko abarundi bariko bararonka ikibanza ciza mu makungu, bagaragaza ubutwari n'ubukerebutsi bafise. Turabakeje.

Tuboneyeho akaryo ko kwibutsa abarundi gushigikira no gukeza benewacu bari ku bikorwa, ntiturindire ko bitaba Imana ngo tubatere amashurwe.

Leta kandi yarabajije abanyagihugu batari bake aho bahagaze mu bijanye no kwinjira mw'ishirahamwe rya poritike ry'ibihugu vyo muri afrika y'ubuseruko ; 70% barabishigikiye.

16. Ibikorwa Leta yaranguye bijanye no kwubahiriza agateka ka zina muntu ni vyinshi mu gihugu cacu.

Reka duce ku mayange ibisata bimwe bimwe.

a. **Mu gisata c'indero** : Leta yarabandanije ishira mu ngiro wa mugambi wo kwigisha abana ku buntu mu mashure y' intango. Twagira dusubire twibutse abarundi ko kwiga ari rumwe mu mfuguruzo z'iterambere. Leta ikaba ishaka amashure n'ivyirwa bijanye n'igihe tugezemwo n'ivyipfuzo vy'abanyagihugu, bituma uwuhejeje amashure ashobora kwibeshaho, akabeshaho umuryango, agaha n'akazi abandi aho kukazera kuri Leta.

b. **Mu gisata c'amagara y'abantu** : Leta yarabandanije wa mugambi w'uko abana batararenza imyaka itanu bovurwa ku buntu, abavyeyi nabo bakibaruka ku buntu . Izo ngingo zatumye abavyeyi barenga **48%** bibarukira kwa muganga, abana nabo birukiye kwa muganga **biyongereye incuro zirenga zine**. Iyi ngingo yatumye ata muvyeyi asubira gupfungirwa mu bitaro canke ngo umuryango ugurishe itongo cane cane iyo umukenyezi yibarutse barinze kumukora .

Leta ubu ikaba iriko iriga ingene abarundi bose bovurwa biciye mu buryo bworoshe.

Imiti n'ibikoresho navyo bitari bike vyarakwiragijwe mu bitaro no mu mavuriro vy'igihugu.

Twaritayeho kandi kurondera imiti yo gupfupfahaza ku barwayi ba Sida, dutako turakangurira abanyagihugu kuyirwanya. Amakungu nayo yaratwemereye uburyo bwo kurangura umugambi wa Leta wo kurwanya ico kiza mu gihe c'imyaka itanu. Ariko rero, turateye akamo abanyagihugu ngo twijukire kwikingira indwara, ntidushire imbere gusa kwivuza.

Turasavye ababijejwe ngo bame bibuka na ntaryo ko haba mu vy'inyigisho, mu gukwiragiza ibikoresho, abaganga n'abaforoma, ibitaro n'amavuriro, ata ntara zokumirwa. Tukaba dusavye abaganga b'abarundi bari hanze ngo bibuke benewabo baze baraza guterera agacumu k'ubumwe mu kubavura.

**Izo ngingo hamwe n'ukwitanga kw'abanyagihugu mu bikorwa rusangi** vyatumye uburundi bufatwako akarorero mu nama yabereye i **DOHA** muri **Katar** mu vyerekeye imigambi y'ikimpumbi mu vy'iterambere, na cane cane mu vy'indero n'amagara y'abantu.

c. **Mu gisata co kumenyesha amakuru** : Amaradiyo, imboneshakure n'ibimenyeshamakuru vyaragwiriye kandi bikorera ku mugaragaro. Mu ntumbero yo kwubahiriza uwo mwuga, Leta ntisiba kugirana inama n'abarongoye abandi muri uwo mwuga. Uyu mwaka twabonanye nabo incuro zibiri. Tukaba dushima ivyo twagiye turashikako, kuko vyarazanye akarusho.

Ico dusubiye kubasaba, ni ugukurikiza amategeko n'akarangamutima vy'uwo mwuga.

Twarongeye turatanga ibiganiro ku banditsi n'abamenyeshamakuru mbere no ku banyagihugu bose.

d. Leta kandi yarategekanije gushiraho umurwi w'igihugu wigenga wo kwigisha no gucungera iyubahirizwa ry'agateka ka zina muntu.

Itegeko riwushinga ryarizwe mu nama nshikiranganji, hasigaye ko ryigwa kandi rikemezwa n'inama nshingamateka na nkenguzamateka.

e. Mu kwubahiriza agateka ka zina muntu biciye mu vy'ubutungane, hakozwe vyinshi:

i. Harahinyanyuwe amategeko mpanavyaha aratomora neza ingene uwagahonyanze yohanwa. Iryo tegeko ririko ririgwa mu nama nkenguzamateka,

ii. Harashinzwe Sentare Rubamba ngo zihashe abibisha ibirwanisho, abafata abakenyezi ku nguvu n'ibindi.

Twosaba izo sentare ko zishishikara, kandi zigatangaza cane imanza zaciwe.

iii. Harubatswe amasentare y'intango, turaronsa imiduga sentare z'intara kugira vyorohe gushira mu ngiro imanza zaciwe,

iv. Haragendewe amabohero kugira ngo tubone ingene ubuzima bwa misi yose bw'abapfunzwe bwifashe,

v. Harakarihirijwe ubwenge abapolisi n'abandi bakozi bajewe ivy'amategeko n'imibano mu mabohero, kandi hararungitswe abaganga baja gukorera mu mabohero.

f. Mu nnumbero yo guteza imbere ubutungane, haratanzwe inyigisho nkarishabwenge ku vy' akarangamutima k'umucamanza no mu bijanye n'amategeko akoreshwa kw'isi yose yo gukingira agateka ka zina muntu.

**g. Mu gisata c'abakozi:** Amasendika y'abakozi arakora ukuri kwamye. Tugasaba ko yofasha no mu guhimiriza abakozi kwitaba ibikorwa.

Twagira twongere kubakebura ngo n'igihe vyoshika bakaja muri za yegereyegere, babikore bisunze amategeko abigenga n'ineza y'abanyagihugu.

Leta turongoye izokwama yumviriza abakozi, ibatunganirize, ariko ntizobemerera ubuki itegeka. Na bo nyene tubahimirije kudasaba amananiza.

Leta rero ikorera ahabona, ntaco inyegeza. Ni co gituma no mu nama yihweza ivy'akagateka ka zina muntu ku rwego rw'Inama mpuzamakungu (ONU) iheruka kubera i Genève, Uburundi bwashimiwe ku twigoro two kwubahiriza agateka ka zina muntu.

### **Barundi, Barundikazi, Neuti z'uburundi,**

17. Intwaro ibereye iri mu nyishu za mbere z'ibibazo vya politike, ubutunzi canke imibano. Aha mu gihugu cacu, urugamba rwo kurwanya twivuye inyuma ba kaboko, abarya n'abatanga ibiturire n'abonona amatungo ya Leta ruracari rwose. Leta rero yabandanije ikoresha inzego zo kurwanya ibiturire, ishinga n'ayandi mategeko atsimbataza intwaro ibereye.

18. Mu kiringo c'umwaka n'inusu rumaze rukora, urwego rw'igipolisi kijejwe kurwanya ibiturire rwashikirije urwego rw'abashikirizamanza **amadosiye arenga ijana (100)**.

Urwo rwego kandi rwarashoboye kugaruza mu ikigega ca Leta amafaranga ashika **imiriyoni** amajana abiri na mirongo ine na zitatu (**243.000.000 FBU**) imbere yuko n'izo manza zicibwa.

19. Kuba izi nzego ziriho kandi zikora, vyatumye abakozi ba Leta bajewe gutoza amakori, abo ku maduwani bagabanura inyifato yo kurya ibiturire kubera ko bamwe muri bo bamaze gushengezwa.

20. Bifatanye n'uko hahinyanyewe amategeko atari make mu vyo gutunganya ikigega ca Leta, imirimo ikitabwaho kurusha, mu mwaka w'2008 habonetse amafaranga y'amarundi ashika **imiriyaridi mirongo itatu na zitatu (33.000.000.000 FBU)** arenga ku yari yategekanijwe kuboneka avuye mu gihugu.

Ubugenduzi bwa Leta nabwo bwarafashije kwishuza abatari bake mu bahora bisamaza ntibarihe amadeni bafitiye Leta; bukaba bwashoboye gutuma hinjira amafaranga ashika hafi imiriyaridi zibiri n'imiriyoni amajana atandatu (**2.600.000.000. Fbu**), burakingira Leta guhomba amafaranga arenga gato umuriyaridi (**1.000.000.000. FBU**)

Ubwo bugenduzi bwarashize ahabona igitigiri c'amafaranga Leta ishobora kwishurwa, akaba ashika **imiriyaridi zine**, abayaheranye bakaba bayemera, abandi nabo bakaba bataronka ingene bayahakana.

Dusavye inzego ziejwe kwishuza no gutororokanya amafaranga aja mu kigega ca Leta ngo zifatire aho, zishikane ubwo butunzi mu kigega vuba bwango.

**Barundi, Barundikazi,  
Ncuti z'Uburundi,**

21. Mu mugambi wo kugarukira uburimi mu nnumero yo kurwanya inzara, Leta yarahaye abanyagihugu ku giciro kiroranye umwavu w'ikizungu naho utakwiye. Yarongeye irasahiriza abanyagihugu ahatar hake mu kubaronsa imbuto, umuti w'ibiterwa hamwe n'amasuka. Haragazuwe amahegitari yababa **amajana atanu (500 ha)** mu myonga, n'ubu tukiriko.

Leta kandi, duhereye ku rwego rw'Umukuru w'igihugu yaragiye imbere abanyagihugu mu kurwiza no gutera ivyamwa. Ntitwibagije kubandanya dukarihiriza ubwenge abarimu b'indimo.

22. Ku bijanye n'ibiterwa njabukamazi, nk'ikawa, icayi, amavuta y'amamesa biragaragara ko umwimbu wiyoungereye. Leta ikaba iriko irarwiza n'ibindi biterwa njabukamazi bishasha.

23. Mu gisata c'ubworozi naho, Leta yarasahirije abanyagihugu mu kubaronsa inka ibihumbi bibiri n'amajana indwi n'icenda (2.709), impene ibihumbi mirongo itatu n'icenda n'amajana abiri na zine (39.204) n'ingurube amajana abiri na mirongo itatu na zine (234).

24. Mu bijanye n'ubudandaji, harizwe itegeko rijanye no kudandaza ibitoro, co kimwe n'itegeko ritegekanya ingene abashaka kuzana imitahe bokoroherezwa mu migambi yabo. Biragaragara ko abarwizatunga bazana imitahe gukorera aha iwacu batera biyongera, ndetse n'abarundi ko bijukiye imigambi itandukanye y'iterambere.

Twokwibutsa kandi ko Leta yitayeho cane gukurikirana ku musi ku musi ikibazo c'igiciro c'ibitoro.

25. Kubera amakuba yashikiye Uburundi, hari abarwizatunga benshi bahomvye ku buryo bitabashobokeye kuriha amadeni mu mabanki. Twarasavye ayo mabanki ko yotezura ingingo yari yafashe yo kubabuza gusubira kuronka ideni.

Ivyo twabikoze mu ntumbero yo gutuma bakora ngo bashobore kwishura kandi nabo biteze imbere, bateze imbere n'igihugu. Amabanki yarabikoze, ubu umwe wese yihwerezwa ikibazo ciwe kw'ibanki aheraniye.

Tuboneyeho akaryo ko gukebura abanyagihugu, abajejwe intwaro, umutekano, ubutungane n'ibanki nkuru y'ighugu ngo murikanure, kuko hadutse ubusuma budasanzwe, aho hari abaza bagashinga amasandugu ngo ni ayo kubikiranira, kuguranana no kwungukiranira, bakegeranya udufaranga tw'abanyagihugu bakigira.

**Barundi, Barundikazi,  
Ncuti z'Uburundi,**

26. Mw'ijambo ryo gusozena umwaka w'2007, twarabashikirije amadosiye amwe amwe yoshirwa imbere mu kwigwa kuko ahambaye naho asaba uburyo, ubukerebutsi bwinshi n'umwanya munini.

Ayo nayo akaba ari dosiye Luberski, dosiye Ruzizi, dosiye y'indege zaguzwe ntiziguruke, dosiye AFFIMET, dosiye interpetrol, dosiye y'imitahe ya Leta yahombeye mu mabanki nka CAMOFI, BCD, BPB, dosiye y'abanyuruje amatungo ya Leta mu biro vy'abaserukira Uburundi mu makungu, dosiye y'abakozi bahembwa kandi batabaho, na dosiye yo gukaba ikawa n'ibitoro.

Ayo madosiye yose yarizwe n'inzego zibijejwe. Amwe amwe aracanonosorwa, ayandi aza ashitse mu nzego z'ubutungane. Dosiye y'indege Falcon nayo ikaba iri mu minwe y'Inama Nshingamateka.

Dusaba ko hokongerezwa inguvu aho ageze, imanza zigatangura vuba, kandi ku mugaragaro ku buryo uyu mwaka wohera umurundi wese ashobora kumenya ivyavuyemwo.

27. Ku bijanye no gushinga urwego rwa **Ombudsman**, Leta yaramaze kwiga itegeko ryoshiraho urwo rwego, hasigaye ko Inama Nshingamateka na Nkenguzamateka ziritora.

28. Turafise kandi umwizero ko uburundi buzotera imbere. Nkako biramaze kugaragara ko dufise ubutare butari buke nk'inzahabu, nickel, coltan, vanadium, n'ubundi. Amasosiyete yo kurondeza yaremerewe kandi ibikorwa bigenda neza.

29. Ku bijanye n'umuyagankuba, harashoboye gusanurwa ingomero zitari nke, izindi ziracariko zirasanurwa.

30. Amabarabara ya kaburimbo yakozwe canke ariko arakorwa na yo nyene si make : hari nka Kirundo-Gasenyi; Gitega-Karuzi-Muyinga; Bujumbura-Rumonge na Bujumbura-Gatumba. Nayo ababa canke bagendera mu gisagara ca Bujumbura, barabona ko igikorwa co gusanura amabarabara kiriko kirarangurwa ku buryo bushimishije. Ibi bikorwa bikaba bitanga n'akazi ku banyagihugu benshi, bigafasha kugabanura ubukene n'ubushomeri.

**Barundi, Barundikazi,  
Ncuti z'Uburundi,**

31. Twari twababwiye umugambi wo **Kwiybakira amashure yisumbuye ijana na mirongo ibiri (120) mu bikorwa rusangi.** Uwo mugambi wararanguwe neza n'abanyagihugu, n'ico gitigiri mbere barakirengeje kure n'iyo, kuko bubatse amashure yisumbuye ashika ijana na mirongo icenda (190), n'amasomero arenga igihumbi (1000) mu mashure y'intango. Rukaba ari urugero rwa 200%.

Turakeje cane abanyagihugu kuri ico gikorwa c'iteka baranguye. Tuboneyeho akaryo ko gukengurukira **abantu, amashirahamwe, imigambwe n'ibihugu** vyaterereye uburyo n'ibikoresho abo banyagihugu batari bake batari gushobora kwironkera, intererano yabo ikaba ashika **imiriyaridi zine n'imiriyoni mirongo icenda z'amafaranga y'amarundi (4.090.000.000 FBU).**

Turakengurukiye amadini n'abikorera utwabo kuko nabo bitavye ako kamo, bakubaka amashure mato mato, ayisumbuye mbere na za kaminuza. Ntitwokwibagira uruhara rukomeye rw'imvukira zaba iziri mu bisagara binyuranye mu gihugu canke iziri hanze zitatanzwe muri uwo mugambi.

Turakeje kandi **abanyagihugu** bariko bariyubakira **ibibuga vy'inkino** hirya no hino mu gihugu.

Ibi vyose vyerekana ko twese tumaze gutegera akamaro k'ishure no kwumva ko ari twebwe dukwiye gukura amaboko mu mpuzu tugakora. Twese rero *twijukire ibikorwa, twiteho umutekano kuko ari yo nzira ishika kw'iterambere rirama*.

**Barundi, Barundikazi,  
Ncuti z'Uburundi,**

32. Duhejeje kubashikiriza mu ncamake ivyo Leta yaranguye uyu mwaka dusozereye. Ni vyinshi kandi ni vyiza, muzoronka akanya gakwiye ko kubinonosorerwa n'abashikiranganji umwe wese ashikiriza ivyaranguwe mu gisata ajejwe.

33. Ubu naho twashaka kubashikiriza bimwe bimwe mu vyatugoye.

- a. Ihindagurika ry'ikirere ryaratumye umwimbu uba muke, inzara iratera.
- b. Ntiturashika ku rugero twipfuza ku vyerekeye kugwanya ibiturire, inyruzwa n'isesagurwa ry'itunga ry'igihugu.
- c. Ibigwanisho bicira umuriro biracariho mu banyagihugu kandi birakoreshwa cane mu bugizi bwa nabi.
- d. Uburyo bwo kurangura imigambi dutegura ntibuboneka ku rugero rukwiye, bigatuma imigambi imwe imwe iceregwa.
- e. Ubukene buracari bwinshi mu gihugu.
- f. Abakozi bamwe bamwe ntibubahiriza amasaha y'akazi, ivyo bigatuma umwimbu ugabanuka mu kazi.
- g. Abagikorera ku bintazi baracari benshi kandi barateza umutekano muke.
- h. Haracari abitiranya ivyaha na poritike.

- i. Hari abitiranya kuja inama n'ingingo no gushaka gusubirira inzego.
- j. Haracari ingendo y'ikinyoma, kudatunga urutoke inkozi z'ikibi no kuzikingira ikibaba.
- k. Harabaye amayegereyere adakurikije amategeko, n'ibindi.

**Barundi, Barundikazi,  
Ncuti z'Uburundi,**

- 34. Turahejeje kubacira ku mayange bikuru bikuru mu vyo Leta yaranguye, hamwe n'ivyatugoye.
- 35. Twagira ubu naho tubabwire bimwe bimwe mu vyo dutegekanya kurangura mu mwaka dutanguye w'2009, tugasaba abagize Leta ko boshikiriza abanyagihugu umwe wese imigambi itegekanijwe mu gisata ajejwe.
- 36. Muri uyu mwaka, tugiye kwitaho kurusha igisata c'uburimyi n'ubworozi mu gutunganya imigambi yotuma duhindura uko twahora dukora, tukitaho no guha akarorero abanyagihugu, tukamenyera kuvomera no gutabira ibiterwa, kubika no guhingura umwimbu.

Tugiye mbere kwiga ingene hoboneka ibanki yo gutanga ingurane ku vy'uburimyi n'ubworozi gusa kandi ku nyungu nto.

- 37. Uyu mugambi uzogira akamaro gakwiye ari uko ikibazo c'amatongo gitunganijwe neza kurusha.  
Tubibutse ko itegeko rigenga amatongo ryahawe abarundi batari bake ngo bariharireko kugira ngo rihinyanyurwe, kandi ivyo bashitseko birashimishije. Hasigaye ko rica mu nzego zibifitiye ububasha kugira ngo rihindurwe.
- 38. Niko umurwi ujejwe ikibazo c'amatongo uriko uratororokanya amatongo ya Leta kandi utunganiriza abahunguka naho ico gikorwa kitaworohera.

Kugira ibikorwa vyawo bigende neza kurusha, Inama nshikirangaji iheruka guhinyanyura itegeko riwugenga, hasigaye ko Inama Nshingamateka na Nkenguzamateka ziryiga zikaryemeza.

39. Tuzobandanya kuganira n'ibihugu vyo mu karere kuri wa mugambi wo gukoresha imiringoti yotuzanira ibitoro kandi tubandanye ubushakashatsi aha iwacu aho vyoba.
40. Leta yarategekanije uburyo bwo kwubaka ingomero z'umuyagankuba ntonto hagati mu gihugu uyu mwaka.  
Turafise kandi umwizerwo kuronka vuba uburyo bwo Kwubaka urugomero rw'umuyagankuba ku Mpanda ruzofasha no kuvomera imirima yo mu kiyaya ca Rusizi.

**Barundi, Barundikazi,  
Ncuti z'Uburundi,**

40. Umwaka w'2009 ni umwaka udasanzwe twizeyemwo vyinshi, vyiza kandi bihambaye.

**Ubwambere:** Turiko turakora ibikenewe vyose kugira ngo uyu mwaka urangwe n'ugushira umutima mu nda kw'abarundi, aho bazoba barara baticura ngo Leta na Palipehutu-Fnl bahava basubira kurwana.

**Ubwa kabiri:** Twipfuza ko uyu mwaka worangwa n'umutekano ushitse.

Dusavye rero urwego rw'igipolisi na wa murwi ujejwe gukura ibirwanisho mu banyagihugu kwongereza inguvu, umwe wese mu bimuraba, kugira ngo dushike kuri iyo ntumbero.

Turateye akamo abarundi bose n'abanyamahanga baba mu Burundi ngo duhagurukire urwo rugamba, dukure iryo kara mu mpuzu, turabe ko amarira yo guhekurwa n'ivyo birwanisho twoyahozwa burundi.

**Ubwa gatatu:** Turatumiyе abarundi ngo baze bitabe uyu mwaka vya biganiro vyo guhanahana iviyumviro ku kugene twoshiraho wa murwi wo kuvugana ukuri no kurekuriranira canke Sentare mpanavyaha idasanzwe. Ibikorwa vyo gutegura ivyo biganiro bigenda neza kandi biraduha umwizerо.

**Ubwa kane:** Turiteze ko igihugu cacu kizoshikira ya sango yo guheberwa amadeni y'umurengera dufitiye amakungu .

**Ubwa gatanu:** Ivyo bitunganye,turategekanya gutanguza ibiganiro vyo guharira ku kibazo c'imishahara y'abakozi, tumenyе amafaranga aja mu gahembo ingene angana, twihweze ingene hogabanuka ubusumbasumbane, turabire hamwe uko hoboneka agashahara kobumba umukozi tutibagiye kumenya iyo kova, dufatiye ku mikoro y'igihugu cacu, na burya kugeza ubu amahera dukoresha ava mu mfashanyo zo hanze ku rugero rw'ibice birenga 50%.

**Murumva ko ari umwaka wo guhangana n'ibibazo, tukubahuka ivyasa n'ibinyegezwa. Dusavye ko uwitonzi n'umutima wo gukunda igihugu, ari vyo vyoranga ivyo biyago vyose.**

#### 41. Uyu mwaka kandi:

1. Tuzokora ibikorwa vyo kurangiza neza ivya ya mashure twiyubakira muri uyu mwaka dusozereye. Ibikoresho bikenewe biriko biratangwa. Vyose bimaze gutungana, hazoca haba umusi mukuru wo kwinjira ayo mashure, ari naho tuzotangaza ido n'ido abaterereye bose.
2. Dushaka kandi ko gushika mu kwezi kwa Ntwarante twoba turiko turatera vya biti vy'ivyamwa twategura mu matuta.

Turashima igikorwa caranguwe n'abanyagihugu kuko twashitse ku mivyaro y'ivyamwa imiriyoni mirongo ibiri na zitanu (**25.000.000**), ariko twari twategekanije imivyaro imiriyoni cumi n'indwi (**17.000.000**), kandi ntitezuba duhejeje kuko ni umugambi ubandanya. Tuzoca dutegura ayandi matuta, tukaba twiyemeje gushika ku miriyoni mirongo itatu(**30.000.000**).

3. Tugije kwubaka, duciye mu bikorwa rusangi, ayandi mashure yisumbuye mirongo itanu (50), hamwe bikazokorwa mu buryo bw'inyubako y'amazu agerekeleranye( étage)ku bavyiyemeje, amashure ijana (100) y'intango, amavuriro mirongo itanu (50), hamwe namatangi y'amazi kuri ya mashure yisumbuye twarangije, n'ikibanza c'iratiro kimwe kimwe mw'ikomine imwe yose.

Aha rero turateye akamo imvukira ngo ziteho iterambere mu ntara zamukamwo, ntizishinge i Bujumbura no kwi haya imigambwe zirimwo gusa.

Turasavye abarundi gukura amaboko mu mpuzu, dukore dushimitse, ntitugume tuzeye imfashanyo zo hanze kuko ak'imuhana kaza imvura ihise, na cane cane muri ibi bihe bitoroshe vy'ighuhusi c'ingorane mu vy'ubutunzi kw'isi. Duhamagariye abarundi **kurwiza na gatatu** ishaka n'umwete vyabaranz e muri ivyo bikorwa uyu mwaka turangije.

4. Tugije kwitaho gutunganya neza ivyo gukoresha neza imiduga ya Leta, igitoro, umuyagankuba, amaterefone n'impapuro mu kazi ka Leta.

5. Kugira kandi turwize umwimbu mu kigega ca Leta, hagiye kujaho urwego rudasanze rwo gutororokanya amahera yose yinjira rwitwa "**Office des Recettes**", kandi habe n'itagisi yo ku rudandazwa bita **TVA** "**Taxes sur valeur ajoutée**".

**Barundi,**  
**Barundikazi,**  
**Ncuti z'Uburundi,**

41. Mu gusozena iri jambo, twashaka gukengurukira Abarundi bose, baba abikorera utwabo, baba abari mu nzego z'igihugu zaba nshingwantwaro, zaba izijejwe umutekano, iz'ubutungane, zaba inzego Nshingamateka na Nkenguzamateka, n'amakungu, bitanze batiziganya kugira tube dushitse kuri iyi ntambwe.

Turakengurukiye abamenyeshamakuru bagiye baramenyesha  
abanyagihugu uko ibintu vyifashe.

Turashimiye n'abakozi b'Imana bama basengerera igihugu cacu.

Abo bose, tubasavye kubandanya kugira ngo umwizerero  
w'umutekano, amahoro n'iterambere dufise ntibitubane indoto.

43. Tuboneyeho akaryo ko kuremesha ababa mu Burundi mwese  
ngo mureke guhagarikishwa umutima n'abanye poritike  
bamwe bamwe ku bijanye n'amatora yo mu mwaka  
w'ibihumbi bibiri na cumi (2010).
44. Turabemereye ko ataco tutazokora ngo agende neza. Ariko  
ntimusamare, ahubwo mubandanye ibikorwa, mubumbatire  
amahoro, kuko umwansi w'amatora wa mbere ni **inzara**,  
**ubukene n'umutekano** muke.
45. Turangije dusubira kubipfuriza umwaka mushasha mwiza  
w'2009, uze ubabere umwaka w'iterambere, w'umutekano,  
umwizerero n'amahoro, tuvuga duti: "***Twijukire ibikorwa,***  
***twiteho umutekano, kuko ari yo nzira irashe ishikana***  
***kw'iterambere rirama***".

Imana ibahezagire,

**MURAKOZE.**